

陵川縣志卷二十三

人物三

國朝曹邦偉以恩貢授江西定南縣令喚咻疾苦宏獎風流士民咸愛戴之會金聲桓發難捍守孤城力竭城陷不屈以死長子翰明次子際盛從子翊明僕伏新等十一人俱從死事聞 誥贈江西

按察司僉事予祭墓廕一子入監從祀鄉賢

和元化順治丙戌聯捷維璋之裔孫鄉貢暖之子任新鄭縣令有惠政卒於官百姓立廟祀之治行文

陵川縣志

卷二十三

人物三

一

章卓然於時惜早歿未竟其緒

秦之鉉字鼎黃弱冠以能文各風流倜儻工於詞賦順治丙戌聯捷初任陝西莊浪縣丁艱起補江西新建縣自武金壇後邑中甲第寥寥

國朝鼎建鉉與和元化聯鑣而起歷任所至政聲遠聞崇祀新建名宦有閩素草汾水秋滕王閣詩等集行世

趙一心順治己丑進士鄉會皆亞魁任長山縣令高才絕學治績尤著清勤前志云懷范滂之大志類

屈原之孤憤抑鬱憂思遂歿于官著有北征草
楊一藻字煥章廩生姜逆發難破城藻慷慨與邑侯
李向禹同時犯難知縣黃國瓌按臺高一請于朝
旌其門曰爭光日月從祀忠孝祠
秦克俊貢生知南豐縣死金聲桓之難而卹典未及
人咸惜之從祀忠孝祠

徐還秦邑貢生孝文先生員嶠次子員嶠峻潔誠篤
還秦殊有父風學博才贍以諸生老有詩名

李汝懋字虎臣中式康熙丙辰科武進士任廣西柳
陵川縣志
卷三十三
人物三
二
州府提標都司固守龍城邊陲賴以甯謐因力疾
勦賊卒於塗督府親爲致祭贈明威將軍品概峻
整有儒將風

楊翔鳳以吏員於康熙十七年授貴州揚老驛驛丞
時滇黔之氛未消八閩騷動驛當荆南要衝羽檄
紛馳夫仆馬斃又軍需屢匱幾難措手平越官吏
多委印去翔鳳獨誓死勤事是時大府揚因事過
驛見其難爲之增馬二十四匹事平補平越訓導官
兼署縣令事越九年轉邢台尉

劉奇聲歲貢生白河令宗顏季子白河致仕歸官橐
蕭然奇聲甫九齡父歿居喪卽如成人及長雖困
銳志於學博通經傳尤長於書教授鄉里諸生多
有以文名者數舉鄉飲大賓經修邑志有司咸旌
其門

甯景俞邑貢生才氣高華號稱博洽喜聚書伏而誦
之與弟珽相師友一室今諷藹如春融工楷法爲
士林模則

武靖遠諸生廉介尙義邑侯孫移學宮靖遠捐修茶
陵川縣志

卷三十三

人物三

三

亭二座孫匾其門曰功高聖域邑侯黃重其品嘗
亟稱曰耿介拔俗壁立千仞所著有孝弟家訓遵
耕讀訓說及唱和詩集

牛魁斗邑諸生幼孤奉母孝家貧無所得師恒依母
紡車分光授讀試諸生高等母輒輾然斗亦承顏
色喜然退輒慘戚傷父不及見也及流寇壓境劫
其母魁斗哭請甚哀賊曰此牛孝子也遂舍之將
貢而卒從祀忠孝祠

和方元化次子性孝友遭兵燹後淡于世榮躬畊奉

母遯老窮山

武毅邑諸生年十四喪父上無伯叔弱弟僅數歲惇
惇母子相依爲命時復兵戈亂離有父遺田數畝
距縣百里毅徒步負米養母後母子避兵東河數
涉險艱嘗負米夜行荒山遇虎不爲害水驟至亦
不溺縣令平重其行舉介賓胡令題其遺像曰處
貧無怨臨難不驚克敦孝友天祐其行岸然道貌
千載如生

任增建少失怙已丑負母避亂山中途遇兵以身蔽

陵川縣志

卷三十一

人物三

四

母跪泣求曰甯殺我毋驚我母兵義而釋之旣而
母因驚成疾建事母病凡巾扇厠牖親自浣滌數
載如一日建年九十餘鄉黨稱孝焉

閆實興縣訓導仲暲父七歲喪父弟方三歲能撫愛
之事生母李服勤順則儼如成人就外傳讀書至
孝親句卽知向館師求解師逆知其天性孝友迨
十七母病在床實侍湯藥三年未嘗頃刻離旣歿
哀毀逾禮至七十歲無一日間可謂終身猶孺子
慕者

姚文炳康熙丙寅拔貢廷試補教習需次縣令天性
純孝入成均念父母不置恐親罹疾病恒寄藥物
聞母病即馳歸及母病不起哀毀骨立廬于墓側
朝夕哭卒侵風霜以死

劉惺邑增生竒聲仲子總角補博士弟子員孝友端
謹不墜淵源尤善書邑生徐佐目之曰性天猶閔
子書法如魯公

和姬化邑廩生少孤依母習讀忠厚忍讓人咸誦之
曾遭劫掠恐盜抵法竟寢其事

陵川縣志

卷二十三

人物三

五

馬掄竒邑廩生孝親友弟鄉黨推重舉鄉飲介賓邑
令平表其門曰多士儀型

武忙靖遠子增廣生素性純飭品槩端良孝繼母友
兄弟爲文不趨時好晚年始入邑庠學者咸尊其
品誼

甯珽歲貢生孝友性成奉母李備盡色養母患痢珽
寢處不離躬滌廁輪及歿哀毀幾殆水漿不入口
者五日絃衾殮具一遵朱子家禮終身好學晚年
不怠諸生就而折衷焉

劉堯封廩生才逸學博品卓行高篤于孝友不屑屑
世俗事常注藥拯人疾苦所著有學庸疏未竟而
卒

徐禧歲貢生任和縣訓導能竭力事父母父病親嘗
湯藥及歿水漿不入口者三日寢苦枕塊百日不
食醯醬期年食粗糲泣血三年未嘗見齒母歿盡
哀盡禮一如之春秋享祀儼如生存宗黨有秉禮
之日

武雅廩生年十歲父歿啼號淚竭喪面失血者十年

陵川縣志

卷三十一 人物三

六

遵祖訓順母心學業成就不負先志祖父母歿相
繼承重不入內不飲酒食肉者六年母沒哀痛不
欲生痛母苦節四十年竭蹶請旌載在郡乘

徐慧龍歲貢生生而純孝先意承志親疾親滌溺器
扶持終始不怠

閔仲暉實子任興縣廣文器度罔厚性慤行方年八
十外猶盎然春和如少時道充德粹人也有子亦
能承家學

劉謙廩生制行正直性嗜古不隨俗爲進退父早歿

春秋展墓每涕泗交集治祖母喪體父志無弗中禮

都俞邑諸生文行爲庠序所推康熙三十一年邑令王舉鄉飲介賓

李煥邑諸生篤孝弟敦嫻睦性恂謹居隣縣治口不言戶外叔無子煥奉養如父又其姪少孤撫育如兒體卹族黨解推鄉鄰倡修郝文忠棣華堂祠舉介賓人以爲不愧云

李旭桂香孫邑廩生淵涵經史行文必窮理境意在陵川縣志

卷廿三

人物三

七

羽經翼傳不苟投世好屢蹈省門無識之者性端確不與物忤朋游推爲老宿

牛冲漢廩生至孝性成親病衣不解帶湯藥必親嘗及歿喪葬一如禮制

王元卣諸生事親孝執親喪盡禮廬墓三年生平言行不苟惜早歿國人哀之

劉文岐邑令王舉耆賓當明季末年流賊入境文岐與其兄向岐負老父母于深山中採野物以養親數十日父母藉以無恙事平歸里人咸異之孫世

旌邑諸生

劉忱邑廩生竒聲季子奉二親以孝撫兩姪以慈家徒壁立讀書不輟六經子史靡弗貫活性不慕浮榮不爲科舉之學蕭然世外

姚之鼎八歲喪母十四喪父稚年孤弱而立志承先敦宗誼篤友愛事事悉體父志子諸生瑁列其事王如且邑增生性至孝竭力事親飲食寒煖纖悉不遺時舉家染病一月中父母繼亡如且病中匍匐親旁凡附身附棺一一如禮學問優長教授多所

陵川縣志

卷廿三

人物三

八

成就

和添壽增廣生家貧篤學習舉業而不應試教授生徒忘懷得失居喪不飲酒食肉者三年

楊鳳翽七歲父歿孝事二母凡養生送死悉如禮制年荒焚券鄉里感之考授經歷

馮沆善事繼母七歲母歿繼母韓撫之韓病彌年食欽動作沆必親奉扶持一夜屢起者凡三十載無間寒暑生平足不出里門口不言是非終日默坐彈琴自娛享年八十餘卒

趙藩克員考授經歷事母以孝稱事庶母以敬謹稱撫幼弟成立內外重其孝友又獨輸百金修家廟爲歷久祀享計藩之篤本根藩之孝友也

焦時雨十二喪母十三喪繼母十七事繼母卹與其父能盡心力家貧無以爲生走河南負米以養之邑令蔣謂其孝行堪爲一鄉表率舉鄉長留七年武元勳考授經歷弟六人皆撫之至成立葺先祠修祖墓諸事悉竭力倡始

楊顯秀氣量軒豁不阿世取容與次子諸生培演感

陵川縣志

卷三十三

人物三

九

應篇中事成帙用以勵俗邑令平嘉其行錫之以冠

徐鍾靈舉鄉約秉公勤事鄉里服其平直邑令韓舉爲鄉飲耆賓旌其門曰義公鄉望一曰惟德動天秦夏生平篤孝義媪母路早寡夏奉養不倦一子夏撫育之又爲族弟完婚配鄰人趙權質美未學夏恐其貧而廢書招來家塾給以膏火權後得入縣庠其成人之美如此

武愿考授經歷好義樂施篤於宗族有族人慶慙懷

惠墓親授室皆傾囊助之且立書室積書籍脩館
穀敦禮先生訓迪本族弟姪輩武氏一門書香相
繼不絕皆愿之力居多

馮君鎬篤於友愛兄歿撫二姪成立並以遺產讓之
武任邑諸生爲童子不好嬉戲讀九經皆手自抄撮
旁及聲韻之學父病親嘗湯藥衣不解帶者逾月
歿後三日水漿不入於口寢處苦塊致傷肩肘間
尺許漸潰成瘡性嗜書聞所未見雖典質必購讀
乃已環堵蕭然咏歌不輟年七十猶註解批點史

陵川縣志

卷二十三 人物三

十

記嘗曰儒者立志當以古今第一流人自期學者
謚文孝先生所著有遺斑集

王繹增生幼承庭訓服勞不倦父疾親嘗湯藥失怙
後事母氏承顏順志孺慕之誠終身如一兄弟式
好無尤教授生徒殷動誘掖值歲荒出粟周急鄉
黨德之

韓方昭增廣生鄉飲介賓品行文章士林推重學憲
曹匾其門曰品高士序

秦夢麟鄉飲介賓事繼母如事所生推誠立教里中

有貧子弟不能就學者咸資給之使卒業邑令陳
匾曰士行克修施匾曰文壇宿望

王德峻鄉飲耆賓居喪悉遵禮制待同祖兄弟如胞
先業所遺悉以推讓比昆季相繼凋謝撫遺孤瞻
孀婦無不盡心力爲之居鄉爲人排難解紛有以
急告者雖自顧屢空必輟轉籌畫以應次子希曾
中庚辰科舉人

武彭齡歲貢生恂恂好讀書教授生徒數十年娓娓
不倦論立品則曰當思不朽二字論處世則曰須

陵川縣志

卷三十三

人物三

十一

明吃虧二字論讀書則曰當體吃苦二字恒以古
之學者勗人博聞多識于邑之文獻留心搜輯衰
集成帙修邑乘方欲採取考據惜遺失無存矣

卽彪兄弟六人父在時兄弟等欲析居彪亟勸孟未
允彪謀于仲兄欲服賈獨力養親不願受產伯兄
悟仍同居如故鄉黨中稱其孝友

魏振卿鄉飲耆賓年十九父母歿廬墓三年咸推至
孝性成

張玉龍拔貢生善讀書能文章教生徒多所成就任

芮城縣訓導見人士頹靡殷勤訓詢加意鼓舞不數年人才蒸起文風丕變焉

趙克敬庠生與從兄同居五十年未嘗忤兄意見兄病親調藥劑不離枕席兄歿待從姪與子姪爲一體四世同居不言分析設義館延師聚村人俊秀肄業其中先後入泮者幾四十人

姚彭家赤貧坦負爲業事寡母盡孝兄歿時遺孤甫三歲彭教養有方嘗向母泣曰吾子有失尙可有子吾姪有失宗嗣誰繼歷三十載卒能教侄成立

陵川縣志

卷二十三

人物三

十三

邑令陳給匾嘉獎擬之鄧伯道

段德麟字玉書溫和敦厚生平不苟訾笑聞議人過輒掩耳避之邑有侯姓者曾爲其子聘婦於某氏後某欲敗盟知其貧故厚索聘金於侯侯窘無所爲計公聞卽傾囊贈之卒完其婚其好義樂施類如此

馬班邑庠生事親孝教子勤立品端方鄉閭表式子司教庠生克敦士行父子俱公舉介賓

武敦字厚甫經明行修學有根底乾隆癸酉舉於鄉

家世積善敦尤急公慕義婚葬凶荒多所俟助於
邑中公事竭力倡始寺觀壇廟每興大工慷慨樂
施素行爲人所推服

秦懋效字松嵐乾隆丁酉拔貢官直隸深州州判工
詩尤長五言清微淡遠直登沈宋之堂而入王孟
之室統名燕南趙北詩草爲陵川六詩人之冠

武維藩字价堂高才絕學博通古今性豪爽日下交
游冠蓋相望以選拔入闈主司得卷擊節歎賞已
列亞元因末場經藝誤印題紙臨榜被黜事發奏

陵川縣志

卷二十三

人物三

三

聞補入科場條例嗣挑取臚錄充武英殿校對候
選教諭歷任孟縣夏縣勤於課士刊吳信辰四書
題詩以啟牖後學告歸後請以丁歸地糧免田民
之累卜築別墅號小南莊日課子孫楷法馳名四
方求書者戶外屢滿老而不倦著四書聲韻詳註
已梓子鳳彩鳳三以名諸生貢成均

王伯儀號雪農拔貢生文才高瞻尤工詩賦析城王
楓船侍御泊水竇斧塘太史俱出其門一時宗工
推爲風雅正宗從康伊山學使遊幕關中卒於渭南

和友邦號曉園潛心力學讀書外無他嗜詩文清微古
淡瓣香於王孟韋柳諸家晚年境益困雖厨中無
米吟詠自適入棘闈十餘次薦而未售以歲貢候
選蒲縣訓導終於官

王琚字崑圃貢生好爲古文力追韓柳歐蘇諸大家
工詩與楊雲亭齊名一時有王楊之號

傅弼字築巖貢生幼負才名作爲文賦皆奇恣博麗
爲名醫懷西先生喆嗣故尤精岐黃寓晉陽時撫
軍藩臬皆延爲上客以青主後身著滋雨山房集

陵川縣志

卷二十三

人物三

十四

散佚罕存

楊灝字雲亭貢生有詩名爲邑六詩人之一

曹旌忠定南公裔孫少有膽識遇事敢爲嘉慶間詔
恤定南公後始勅世襲族人無敢應旌忠獨赴京
引見遂承襲恩騎尉累世罔替以千總歸營試用
委署本邑城守營弁人僉榮之

楊焮豫成父教讀終身會館高平祁宮保家博極羣
書篤志功名踏并門秋風十二度屢薦不售以明

經終

武威遠字安亭歲貢敦品砥行以嚴正爲閭里所憚
嘉慶癸酉豫匪入界邑令議守城威遠毅然曰守
城不如守山山在則城無庸守山則失守城無益
况五百八十三莊生靈甚衆是彈丸者卽令能守
其所全幾何也卒從其議遏賊西竄之路城賴以完
又邑中地糧向係以釐爲分民受其累商於邑侯
力詳 上憲卒革其弊其強毅有爲類如此

楊燭號曉園增貢生型家有法善處兄弟之間爲閭
里矜式其卒也高邑祁恭恪公爲誌其墓子觀曜

陵川縣志

卷二十三

人物三

十五

官至四川觀察使

甯衛卿字愚亭性溫和而學純篤有聲文壇劉公紹
先登賢書求示闡稿一見輒喜曰我知所以得之
矣次科庚申恩榜果舉於鄉居恒樂敦善行修耐
義倉捐鄉會費僉爲倡勸晚習岐黃以濟人

楊乾初字葆元少承家學風流跌宕善屬文嘉慶戊
辰中式丁丑大挑分發福建初署甯洋縣事詢民
疾苦讞獄虛公詳慎設循環簿按月申達上憲喜
其平允檄各州郡視以爲式勸興學校刻作詩法

甯士習聲病者始多旋題補邵武其課士如在甯
尤爲添設膏火體恤寒畯兩次調簾分房得元所
取多名下士人服其賞鑑在邵去串都之害與聯
甲之法東北有天羅磔者俗號小臺灣棍匪相依
爲奸穢厥渠魁積弊爲之一清又於城北河口募
修義渡戒水手之需索行李往來口碑載道甲午
歲霖雨四旬籌米平糶慮滋事者煽貧民爲亂憂
懼未幾卒於官刊本邑六詩人稿著就正詩文集
梓以行世子長春官工部郎

陵川縣志

卷二十三

人物三

十六

張翥工篆書潛心學古嘉慶癸酉選拔陪貢旋中副
車以母氏苦節竭蹶請旌於邑之公事躬親倡率
好爲人排難解紛終身不倦

劉儒鳳平城人博學能文尤精左氏春秋嘉慶戊寅
舉於鄉任潞安平順鄉學數年告歸終於家

馮式邁三泉村歲貢以古學馳名律賦膾炙人口嘉
慶間應五台召試屢冠羣英以數奇爵賞卒無得
都長壽號眉山副貢文壇夙望日課數十藝援筆立
就出其門者試輒高等采芹如拾芥善爲初學津

梁著有敬業齋稿門人婁仲選梓以問世

秦萬壽字恒山歲貢生教授閭里以嚴見憚嘗博考載籍輯郝文忠公年譜附文集後

馬延年耄而好學娓娓不倦累踏井門薦而未售嘉慶丁卯賜副榜戊辰賜舉人已巳入京師賜國子監學正里人匾其門曰鴻恩三錫

李薪池下村職員富而施道光間歲荒雜粟於糠量濟村衆全活無算明春復出麥百餘石以施種生平積德至今戶頌焉

陵川縣志

卷二十三

人物三

十七

薛鳴皋字鶴亭品端學粹未冠登賢書旋成進士分司銓部熟悉例義多所改定則例館冊署爲總勘以銓選屢與上官抗辨守正不阿二十餘載幾老部曹後因廷章交薦遷監察御史遇事敢言絕苞苴有關節不到苞老之風未幾告假歸捐二千金歸澤郡試館於京師返里修廣惠倉利賴甚衆主講邑書院以實學勵諸生翁稱爲道學咸豐九年卒於家別有傳

王汝楫號松舟孝廉希曾次子有名士風流游京師

以明經肄業太學與竇斧塘太史王楓船侍御相
頡頏報滿用學博候選歸家居榭木山莊詩酒倡
和座客常滿自號西溪老人著有西溪詩集子婿楊
觀察梓以問世

楊豫成字立之博綜經史性耽吟詠教授於邑之寶
應寺者十載道光元年舉於鄉十上春官屢薦不
第甲辰大挑分發江西署安義縣事值歲祲平糶
緩征民感實惠旋題補龍南歷巡四鄉懸格捕盜
獲名賊百餘縣境肅清奉檄分防通判觀音閣橫

陵川縣志

卷二十三

人物三

十八

崗之勝禦擊粵匪有功以同知直隸州升用補甯
都未及期年調署贛州府因粵匪洪秀泉道九江
南康窺入腹地援兵登陣州印襲衣誓以死守籌
餉設策大小三百餘戰未嘗少挫守贛六年省城
以外九郡相繼淪陷而贛城獨屹然無恙士民胥
倚安圍既解復勸捐砲船及倉穀六萬石論功用
知府賞戴花翎壬戌去贛委署南安殘破之餘百
廢俱舉積前後勞以道員留江補用甫去任將引
年遽以疾卒贛人祀入名宦刊有享帚詩集問世

子長達江西候補知縣

甯敬止歲貢生處世謙恭無少長每見輒揖學行見重於鄉閭

楊觀曜字麗軒豁達不羈由廩貢生教諭河津六載得保舉知四川雙流縣修考棚以造士除輜匪以安民歷任六年先後拿獲首犯數十名紀大功升任階州旋署眉州因捐議叙知府加道銜兩次署永甯道正值軍務屢經戰陣勤勞不懈因公墜誤卒於官子長庚現任四川縣丞

陵川縣志

卷二十三

人物三

十九

秦廷堅歲貢生篤志慕古性術嚴正不隨俗尙人稱古公

曹遐齡字宜亭歲貢生以文學起家督課甚嚴視功名爲性命教仲子鴻舉卒成進士孟季皆有聲庠序

王恩濺號梅知伯儀次子父子選魁負時盛名工詩善賦天才放逸爲黃學使所器重延至河朔書院爲人不修邊幅有狂士風

婁仲選一字萬青質樸寡言力行善事情字紙印經

文懸夜燈以照人行施館穀以啟幼學生平慕小
倉山之爲人自號景袁譽重文衡楷法尤善卒以
明經老著擬明史樂府二卷待梓

張永昭字小銘工詩文交多名士不以豪富自矜見
義勇爲嘗爲王又癡刊樹萱堂詩草

王臨池字墨溪 恩貢生學有實行素履端方先世
賈於豫父卒扶襯歸塋事祖母寡母均以孝聞家
貧勵學不慕榮利自乙卯秋闈報罷後遂絕意功
名悉心訓誨一時文士多出其門其學自經史外

陵川縣志

卷二十三 人物三

三

旁及諸家無不瞻博晚年尤精岐黃術濟人甚衆
及同治丙寅巳貢成均尋蒙 覃恩例改恩貢時
年七十三歲與邑中諸耆英互相酬唱徜徉詩酒以
終餘年著有墨花香村詩稿待梓子二仲庶熙邑
庠生先卒伯庶皞乙亥 恩科亞元

都九疇字瑞徵歲貢生事繼母以孝聞撫弱弟以友
聞慕義好施周恤族黨臨終囑子捐聖廟外地以
廣宮牆事聞旌表建坊祀忠義孝弟祠子賦三甲
子解元

楊咸和字堯民敦本睦族型家有法選道光乙酉科
陪貢居喪讀禮百日寢苦自問南俊遊歸設藥以
濟困窮延師以教戚族每遇公事卓然有爲如復
社倉修文廟諸大役指不勝屈至治家尤有禮法
迄今猶稱楊氏家規

曹鴻達字翊廷進士鴻舉兄少年與弟齊名高才博
學睥睨一時科歲試輒高等秋風十五度屢薦不
售丁酉鄉闈中式復置遂絕意進取以恩貢終

武鳳彩字五峯教諭維藩四子性行嚴正博學能文

陵川縣志

卷二十三

人物三

三

屢躋秋闈以明經老楷法蒼堅碑版照世綽有父
風

曹鴻舉字秋皋博學高才溫雅可親由選貢中式京
兆三潞城平順書院講席多所成就潞士匾其堂
曰經師人師丁未成進士殿試二甲楷法端嚴咸
以館閣期許未酬厥志即用河南大吏僉欽其才
學郭臬憲延爲子師聞望日盛以大用期之秋補
授溫縣未之任遽卒鄉會墨鎔經鑄史俱膾炙人
口著有印雪山房詩草待梓子振翰已卯恩貢生

韓懋德號厚菴天才敏捷少擅文譽道光甲午鄉試
獲雋甲辰成進士即用浙江歷任青田分水縣事
是秋調簾文占首房得士多名宿俞太史應方伯
俱出其門派委運銅滇南艱苦備歷差回改禮部
精膳司主事告假在籍主本邑講席教人學文以
熟復先正大家爲宗平生天真爛熳和而不同晚
年精堪輿術卒於家

秦能復恩貢生孝友成性接人以和痛父績學無名
請封追贈撫愛弱弟盡以財產與之善處鄉里爲

陵川縣志

卷二十三

人物三

三十一

人排難解紛老而彌篤

曹鴻文字漢章性慷慨文風華弱冠後遊府庠食廩
餼與伯兄鴻達仲兄鴻舉頡頏一時有聲塲屋邑
侯劉子容獎予匾額擬以河東三鳳暇則與諸名
士得詩酒之會高談雄辨四筵皆驚棘圍屢薦不
售歲乙卯將貢成均時秋闈又報罷鬱鬱而卒士
論惜之

楊長春號菊人工詩生平儉以律已勤以服官由廩
貢援例主事戶部轉工部升虞衡司員郎三歷部

曹均得政體以遜退稱於時告歸卒於家薛侍御有輓詩

韓子庚初名懋行進士懋德翁自幼慧悟經史過目成誦曾館高邑祁恭恪公家博覽古籍後隨兄遊宦南服自謂得江山之助文格益進尤好研究韜畧剛強自任壬子中式副車未竟其志而卒

李應又孝廉載子以父任平陽訓導歿於官負骸還鄉事旌表孝子

秦秉範字水村沈默好學耿介性生家貧備書度日

陵川縣志

卷二十三

人物三

三

及有聲庠序豐於舌耕而自奉無異貧時惟事父甘旨需備極充裕道光己酉科拔貢就職直隸州州判時有友願助資勸仕出毅然以親老力辭鄉黨咸以孝稱邑有公事持正不阿士踏并門積學未逮嘗庭訓諸子曰人生讀書明理綱常倫紀無虧乃真學問非徒爲博取功名也其抱負之宏遠可想見已得年五十卒著有硯荷廬詩文待梓武心廣字寬人郡增生孝友性生執親之喪守制六載事兄無違同居和睦四十如一日授徒鄉里儉

以養貧著春秋王侯諡號歌一卷四惜齋詩文二
卷待梓

李苾號蓮溪性敏好學幼負才名戊午鄉舉辛未大
挑一等用知縣分直隸北河候補以能幹著權篆
雄縣未周月去任遽卒

都賦三字京堂彙甫其號也少負敏質未冠登庠序
屢列優等同治甲子科以第一舉於鄉應禮闈薦
未售隨以知縣註冊銓選由都歸里嘗語人曰與
其覓官於朝不如退耕於野自號退耕野人遂無志

陵川縣志

卷二十三

人物三

十四

任進終老於家生平急公好義光緒戊寅歲大祲
兼有豫匪患境賑防金舉出力爲優大富獎以學
道愛人匾額邑學宮前照牆規模逼隘文氣不舒
累年科名減色同治間慨然以已近照牆地三畝
餘捐作廟塞籍資宏闊自是投巍科名相繼不絕
尤見稱於士林卒年古稀著有秋由書屋文稿睡
餘隨筆詩草待梓

曹登瀛字仙洲學術純正謹言慎行事繼母以孝聞甲
子舉於鄉辛未成進士以知縣分發河南卽用到省

一載未任而卒

武培德字樹滋金武氏三狀元裔篤好經史過目不忘工屬文初執筆時出言驚人幼肄業望洛書院即受知於薛鶴亭侍御侍御峻節高風於人少所許可獨於君稱忘年契後歷任官師無不刮目以視舌耕幾三十年列門下者皆一時俊彥七踏并門中同治癸酉副車以直隸州州判注册銓選雖屢舉不第而文日益精尤邃左氏學著有十二公時勢論舉芙山館課藝待梓泊水竇千山觀察贈

陵川縣志

卷二十三

人物三

二十五

以詩云他日立朝能鎮靜薛夫子後獨君期是其爲人又不僅長於文詞已也庚辰歲邑宰李明府延修縣志草創胥出其手未及蒞事因疾遽卒惜哉子孔泗邑庠生

秦炳字一農幼擅聰穎長多智謀家雖貧好學不倦能承先志選同治癸酉科拔貢旋游京師考取八旗官學漢教習傳補正藍旗教習俸滿以知縣選用未任而卒著有守硯堂詩文稿待梓

韓懋昭字勉明歲貢生進士懋德之季弟有品有學

克儉克勤爲文簡易構思最捷一題立成數藁試
輒冠軍辛酉鄉闈以額滿見遺自是遂無志功名
惟以教育人材爲樂一時遊其門者稱循循善誘
云子之倬邑廩生

杜士俊黃庄村人性戇直家貧食力其父懷宏歿於
河南盧氏縣誓取父骸苦不知所行近盧邑過一
山谷遇虎倉猝莫避虎竟不傷而去山上人異而
問之士俊告以故愁容可憫中有姓李者名秀蹊
愕然曰我與爾同鄉昔爲爾父夥爾父死卽我爲

殯今遇虎不傷孝所感也士俊大喜叩謝遂得父
骨所在其人且爲謀曰爾父與莫某爲莫逆交某
昔試京兆無資爾父曾助以百金後得官報之不
受今以翰林在籍盍往投之彼念舊交必使爾父
輿櫬而返士俊曰吾來時一無所知今得君示殯
所在已出望外何敢他求况父在不愛彼報今我
求之非父志也遂忍困負骸而歸欲合母墓而母
厝於崖岸樞夥不辨無奈號泣三日一柩忽糝土
崖磚裂審視之母碑在焉喜而合墓村人咸稱之

爲杜孝子

李天成景聚次子家貧性孝同治間歲飢境尤迫雖有父兄貿易中州不暇內顧母又染疫疾晝夜呼泣天成仰屋長吁無所爲計因竊剖胸前肉烹調以進母病頓愈嗣因菽水無資一日向郊外野哭忽見空隙有物拾得古錢百餘銀少許持回奉養母賴以全

好善樂施

明徐璣伋子正統四年荒輸粟二千五百石賑饑旌

陵川縣志

卷三十三

人物三

二十七

表授七品官

趙翺天順三年荒輸米三百石備賑勅諭旌表

徐鉞成化年輸米六百石賑饑旌表授散官

徐鎮成化中輸銀四百兩賑濟勅授散官

武鶴成化五年輸粟五百石賑荒勅諭旌表

徐樑成化九年輸銀助賑勅授散官

王興成化中輸粟助賑旌表

武信成化中輸銀三百兩授義官

甯溫甯演宏治中輸粟一百石賑荒旌表

秦洪秉公仗義萬歷十四年荒輸粟二百石濟賑

秦應雲輸粟二百石 奏孟魁輸粟二百石

李國卿輸粟二百石

張守庫 楊憲 武應鰲 趙守安

楊爾茂 秦應化 焦守金 王希鴻

徐大經 王孟節 蘇廷甫 秦一貫訓導

馮時達 侯守真 馬尙升 李發榮

桑萬庫 郭大利 秦繼堯 馮學讓庠生

以上各輸粟一百石濟荒

陵川縣志

卷三十三

人物三

秦恒吉廩生自設粥廠活人甚多

李長茂輸米二十石 楊友仁輸米二十石

路孟宜輸米四石五斗助賑

王寬敦厚周謹隆慶二年捐資助軍餉劄授太醫院

吏目

都志宏因學宮地隘捐地一畝有奇以廣其址

婁凌雲因遷學捐地一畝有奇樓屋一所

曹邦甯民信父雅有德量年荒出粟救饑由庠生授

禮部儒官

李勤年高德邵尚義輸財萬歷元年給冠帶

楊文魁德重鄉評崇正二年出粟賑荒大部給以冠帶

徐允敬樂義好修崇正二年煮粥活人有司勒石誦義

甯一相樂義好施崇正十三年大饑邑人餓死於道者相枕藉肉骨散棄原野一相募人日往瘞之凡千有餘具子二景俞珽皆名諸生

婁繼祿捐助學宮地畝 曹廷撥賑貧撫姪

陵川縣志 卷三十三 人物三 五

路達輕財好施 韓思順慷慨尚義

武深清排難解紛 都拱極秉禮鄉約

王一代重義敦倫 馮瑗友愛讓產焚券卹貧

徐岐好善樂施

國朝曹民悅邦甯子邑諸生孝友慈和如其父兄教子有方年饑與兄民信共輸粟以賑鄉里事聞偕旌

曹延庚貢生民信子任紹興府通判承父志與弟延禧獨建明倫堂凡費五百餘緡

都勲歲貢生孝友耿介爲士林矜式居喪盡禮王子
遷廟學任創齋廊尊經閣費五百金而不專名尤
屬義舉

姚可頓教習文炳父康熙間兩舉鄉飲賓年八十餘
柱杖井里慷慨樂施鄉閭憤爭者屢質成之有陳
太邱王彥方之風賙卹貧苦竟無虛日當孫令治
縣時可頓獨捐倉穀五十石以備荒遇荒旱合村
窮乏者給粟以濟之里人至今猶戶誦焉

王瑛敦倫重義終身不入城市耕鑿自給外即以散
陵川縣志

卷二十三

人物三

三十

親鄰

武雍鄉飲耆賓老成典型經理修學獨多勞勛邑人
榜其門曰勞謙終吉

李孔懿急公慕義雍正間公舉耆賓且助修學宮凡
邑之公事靡不盡力

和參化廩生兄弟讓產更能賙卹宗黨
王麗性行慈和值荒歉與其兄彭設粥濟人貧者賴
以存活

劉端制行剛方遇親黨輻輳事輒排難解紛且好義

樂施康熙間邑遭饑饉極力賑卹族里得生全者甚衆

劉堯齋廩貢生大節行義力追古人年荒析券周急惟力是視人有善輒津津樂道歿後人猶稱之

郭守璧友愛兄弟周濟鄉鄰爲善惟日不足康熙六十年荒出粟賑濟本村饑民多藉全活乾隆元年復以本村外路入長治行者必由牛皮掌山坡陡峻人畜疲喘行旅苦之守璧於村北特闢一逕寬平接高嶺舖約十里於三道河建石橋其泥塗者覆以石往來便之

徐最生平疎財重義撫幼姪本照讓以遺產親黨窮乏者有求必應多扶植族人貧不能婚娶者悉成全之

都燕性耿正鄉里爭訟每就燕解之貧困者不靳解推又捐銀六十四金修王兵備祠感其有全城之德事載祠碑

王中瑗素行端良尤踴躍募義香磨河窄港口每遇水發湍激渡人時有沈溺之患中瑗獨力駕橋者

十載乾隆四年乃倡議鑿山開廸以避河水爲久
遠往來之計因身任其事不惜勞苦二年餘而成
行旅至今賴之

馮君顯邑庠生康熙八年捐嶺西村松坡地一段於
龍神祠以供修葺糧銀立單令四子分認後青松
成林西溪村欲行攘去其子滋出理前令平斷明
以河爲界永歸廟祀

魏振璽公直存心寬厚待人樂善好施

王慎修貢生捐輸樓房四十七間爲書院巡撫阿賜
陵川縣志

卷二十三

人物三

三十二

額旌之有借貸不能償者率焚其券又嘗輸藥餌
以救疾苦有司屢旌其門著有鳴情草

楊呈秀平生純厚康熙間大飢斗米錢五百餘呈秀
出所蓄分濟族人及鄉里困餓者偶市行拾一包
裹約百金卽坐守不去或妄認詰數不符旣聞沙
塲村徐姓因酒醉失金卽寄語使來認訊其詳得
寔悉以還之鄉里稱羨邑令韓匾其門曰齒德兼
優

張爾相性耿直不詭隨事繼母如事所生教兩幼弟

讀稍惰輒啼泣垂訓弟感悟始憤發析產自取其
薄者曰弟輩讀書無生計吾竭力經營猶可成家
值歲飢鄉佃多負租爾相悉免輸且各恤其家爲
人排難解紛里有疑難皆取決焉

任子兆賦性溫良事親定省不懈父母病飲藥必先
一嘗之代弟償債百金睦於鄉里嘗賙恤其困乏者
郭壯京貢生鄉飲大賓石井村人乾隆四十三年春
旱又值隣封飢米商不至車集缺少壯京買三百
餘石賑本村貧乏者

陵川縣志

卷三十三

人物三

三十三

焦恒福職員慷慨樂施周恤族黨婚塋荒歉多所願
助鄉里貧民爭頌其義

附載

曹洵歲貢生淹貫卷軸不以歲月移

馮君就邑廩生資性高邁不苟同乎流俗

徐佐諸生以詩書爲菑畚疏水自甘泊然處榮利之外
和俊廩生博學能文守正不阿有古狂者風

和象元邑廩生閑洽博通有文有行尺寸不失矩度
李昂廩生賦姿灑脫行文亦復如其人

趙慧遠拔貢生高雅絕俗冥情卧游不役役于富貴
不戚戚于貧賤

曹棠邑廩生天性孝友容止端莊

王心庠生樂善急公以禮自處

曹度讀書安貧非公事不見邑宰

王璵增生事親盡力持躬端謹有白華之潔

宋國樞邑諸生正直端方舉止不苟

甯書源邑廩生賦質純厚植品端方

牛相陞天文生事祖父母及本生父母承顏順志皆

陵川縣志

卷二十三

人物三

得歡心學憲蔣匾曰孝友型家

趙景鄉飲耆賓品行端方好善樂施

趙暉州同為人公直排難解紛

魏振世疎財仗義經商湖廣為人排紛解難還里之

日餞送者數百人

寓賢

唐秦略邵陽人神龍中任涪川令升高華尉卒葬陵

川

申環金成郡人咸通中徙陵川縣北之蒲水村養性

間居無縻爵志卒葬村西陽山下有人題其墓曰
可惜荆山玉沉埋曠野間

五代楊筠松時號救貧先生爲武氏相阡地於赤石
山下至此

金元好問遺山太原人甫成童學舉業其先人泰思
所以引而致之者謀諸親舊間皆曰濩澤風土宗
厚人質直而尚義在宋有國時俊造輩出風俗既
成益久益盛迄今帶經而鋤者四野相望雖閭巷
細民亦能道古今曉文理爲子求師莫此州爲宜

陵川縣志

卷二十三

人物三

三十五

於是就陵川令之選命好問受學於郝天挺六年
業成下太行趙禮部閒閒見其詩謂可繼杜甫京
師稱元才子後過澤州有高平道中望陵川詩云
書卽零落頭今白腸斷荷衣出拜時尋請修金史
方闕館會有沮之者不果乃構野史亭采摭遺事
汗牛充棟輯金源君臣言行錄書未就而卒郝文
忠經志其墓稱爲蘇軾黃庭堅後一人初以興定
進士歷南陽內鄉令終左司員外入翰林知制誥
金亡不仕

路元高平人爲省曹尚書郎五典郡事豪猾見畏人以路包拯呼之累遷河南按察轉運使後卒老邑之附城鎮子孫遂爲陵川人

李俊民號鶴鳴老人唐韓王元嘉後家於澤州得河南程氏之學金承安中舉進士第一應奉翰林文字未幾棄官不仕以所學教授鄉里來隱於邑之嵩山後徙懷州俄復隱西山元世祖以安車召至延訪乞還山遣中官送之卒謚莊靖先生

元徐貴字仲平雲中人卜隱陵川

陵川縣志

卷三十三

人物三

三十六

技術

宋都嚮舉進士博學通醫政和間官宜議卽掌太醫院事遠邇求診應手輒愈能以其術鳴

國朝王石麟邑東石掌村人武生性質直好讀書留心醫學能通解終日兀坐手一卷不釋惜天不假年未竟其術

寂滋南坡村人出家崇安寺爲僧住持南坡佛刹少得異人授精外科善針灸凡無名症一見輒辨療無不愈時人比之華陀惜無傳其術者

方外

晉樂氏二女先陵川人始娠感神光而生繼母呂遇之酷冬月單衣見脛責採茹號於野泣血漬土產苦苗赤葉斑如持奉母虐愈甚移家壺關紫圍山使拾麥穗遺穰無所得呼天號訴忽感黃雲二女御之以升田野見之驚歎以爲仙去唐乾甯進士張瑜所撰仙墨碑云羅神之曲紅裳繡履歲儉求之卽豐時旱禱之卽雨迨宋崇甯間王師拒夏乏食復傳二女顯靈飯軍封冲惠冲淑真人廟號真

陵川縣志

卷三十三 人物三

三十七

澤 按石城許穀碑記二女晉時人今西溪有廟
(金)通真子秦志陵川人棄應舉學道隱王屋少室間後遇披靈老人於上黨授道籙遂立局平陽元都觀校補三洞書訖倏風雷大作卽立化著林泉集二十卷

(元)珍講王禮義鎮人張姓禮崇寺僧洞曉禪機後枕右股而化

(國朝)康熙間有胡僧者髮垂至肩足不着履見人好爲隱語流寓南馬附城間十餘年後莫知所往

雍正間有編筐和尚居縣南郭家川戒行潔清日以
編筐爲業嘗自作詩曰世情與我淡我與世情疎
太行山上月皎皎一輪孤又能預知某日涅槃示
衆爲禮讖至日梵唱喧闐和尚果合掌冥坐倏然
委蛻